

Das letzte vnd dritte merck vnd kennzeichen an den banderolen dieser Compagni war Venus. Wie gewaltig nun dieselbige vber die menschen sey / ist nicht allein aus voriger beschreibung / sondern auch der teglichen erfahrung selbs offen vnd wissentlich. Die alten haben sie genennet vnd verehret eine Göttin der Liebe / des lusten / Liebligkeit / Schönheit / Anmut / Gunstes / vnd in summa auch sonst aller anderer Wollüsten. In wasserley gestalt aber sie dieselbe weiter angebildet / ist solches viel zu enge an diesem orte zu erzehlen. Doch ist ihre macht einmal gewiß / ja das auch die jenige / so vor der ganzen welt stercke vnüberwindlich geblicben / dennoch von der Liebe bezwungen worden / inmassen solches an Hercule, Alexandro, Casare vnd Augusto zu erweisen. Also ist auch in derselben mechtig die begierde sich zu vermehren / die begierde zu allerhand lustbarkeit / zu schönheit / zur liebligkeit / die bedierde durch friundligkeit vnd wohlthat / oder sonst hohes vnternemen menniglichs gunst vnd neigung zu erlangen. Also ist in derselben gros die herzliche neigung vnd anmuht zu seinen Eltern / zu seinen Kindern / verwandten / zum freunden / zu wohlverdienten Leuten / vnd endlich auch das verlangen zu denen himlischen Gütern. Also ist auch hinwiderumb nichts weniger krefftig die macht der Wollust / wie in gleichem die begierde vnd neigung zu dem bösen in derselben / welche / wil des andern geschweigen / starck genug die gewaltliche krieger vnd vnmenschen zu vberwinden. Dann so bald sich ein streitmechtiger heldt an die wohlust ergibt / wird das verlangen zu hohen thaten vnd ruhm als bald in ihm verleschen vnd abgehen / wie dann solches bey Capua dem kriegserfahrenen Annibali, and nachmalen dem mechtigsten gefürchteten Cimbris in Venetia widerfahren.

Ruhn aber zu widerkehren zu vnser Compagni fernerem habit / vnd anfangend die waffenröcklein der Adventurirer, wie auch dero Patrinen / trommeter vnd lackeien fleidung / waren dieselbige mit eben der Fortunæ, Fortitudinis vnd Veneris merck vnd kennzeichen / nemlich mit geflügelten kugeln / mit lewen vud seulen / vnd mit brennenden herzen hin vnd wider besetzt vnd gezieret.



Voranritt ein Zwerch in leibfarbem vnd rotem habit / nach ihm kamen die trommeter / viere an der zahl / nach denen trommetern drey Adventurirer mit rot vnd weissen decken vber die pferde / wie auch gleicher colôr feddern / vnd hatte ein jeder vnder ihnen eine fahne ziemlicher größe / daran nechst erklerete bilder / als Fortuna, Fortitudo vnd Venus, wie gehört / semplich vnd zugleich angemahlet waren: nach den Adventurirern drey lackeien. Denen folgete das haupt vnd obrist dieser Compagni / vnd nach ihm drey patrini / so da auch fahnen / doch etwa kleiner als die vordern / vnd an deren jeden nur allein eine aus vorermelten Göttinnen angemahlet / führete. Dieser Compagnie pferde hatten semplich rohte schweiffen.

Vnd dieses sey also von der ersten Compagni  
dero Adventurirer.

Be.